

Kaarata ya neethaaru yoolebiwa ni Zhuwawu

Madhu oovolowana

Murumiwi Zhuwawu olebile kaarata ela muwari mwa yaaka 70 ofiyedha 100 Kirixtu agabaliwe. Amulebele mukwaaye mmohi, eethaniwa Gayu, oyene ahidda mabasa owiimelela mu gerezha emohi Zhuwawu yeeng'aneliye.

Va kaarata ela Zhuwawu afuna omooniha ofuneya wowawaakela aleddo enalaleya Muselu Wapama mmuruddani mule. Wawaakela aleddo ala, bu mukalelo wowooniha odhivela, fu odhivela.

Ogawanyeya wa kaarata

Madhu oolajela 1-4.

Wawaakela aleddo aKirixtu 5-12.

Malojelo oogomihedha 13-15.

Madhu oolajela

¹Wa oodhivela Gayu onamudhiveliimi mwa ebaribari. Di miyo, mpogo a gerezha.

²Oodhivela aaga, ginoolobela wi dhaatedhene dheedde pama ni we, okale ni egumi yapama wona mwemo mukaleliiwe pama mmunebani.

³Gahihagalala vajinji aKirixtu amohi vadhiliwi ya yiirelaga onamoona wa ororomeleya waawo, muneeddeliwe mwiibaribarini. ⁴Kaginna ohagalala wuulubale ohuli wiiwa wi ahima aaga^a enoweedda mwiibaribarini.

^a 1.4 Ahima aaga enaagiwana aKirixtu ayene Zhuwawu yasuuzihiliye wambeela vamwaakeliliwa Kirixtu.

Wawaakela aleddo aKirixtu

⁵Oodhivela aaga, we onororomeleya waakamihedha aleddo aKirixtu, naari ohaanonileve. ⁶Amohi vaari va aliwa yahaaddela gerezha wuno, yahivelela onamoono wa odhivela waawo. Ayo eli wewo dhiinova yaamaruwaga, yaali yapama waakamihedhe mwa mukalelo wofwanelela wa Mulugu. ⁷Vowi aliwa yahimaruwela olendo womwiimelela Kirixtu, kinarumeedha yowaakamihedha odheela wa athu oohuroromela. ⁸Mowindo soofuneya waakamihedha athu owinda wi naande okala anamalaba amohive mwa mabasa a ebaribari.

⁹Gihilebela gerezha mbwenye Diyoterefi, onadhiveliwa okala musogoleli, kananiwelela. ¹⁰Mowindo miyo gadha wewo ginowoga dhedho dhineeriye, aniwogelaga hiyo madhu abure. Kanadhiveliwa wiirana dhedhove teto kanawaakela aleddo aKirixtu yafiya. Onowahiiha ale enafuna wawaakela addibila ale, ofiyedha waathamagiha mugerezha ale enawaakela aliwa.

¹¹Oodhivela aaga, kuhadhihege mweeddalo wabure mbwenye ohadhihege mweeddalo wapama. Aatene eneerana dhapama ba Mulugu, ole oneerana yabure kanamoonene Mulugu. ¹²Owoga dha Demetiriyu, aatene enowoga dha opama waaye, teto ni ebaribareene enomwiirela onamoono wa opama waaye. Hiyo teto nnowoga dha opama waaye, nyo muhunona wi onamoono weehu bwa ebaribari.

Malojelo oogomihedha

¹³Gihikanna dhijinji dhowuulebela mbwenye kaginafuna ohela mukaaratani mu. ¹⁴Ginojejiha wuwoona voozulogela, ndo nneere owoga vameentoni ni vameentoni.

¹⁵Murenddele okale ni we. Akwiihu wuno enowuulojela. Ogilojelele akwiihu wewo kadda muthu va yeeka.